



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim


ig tiryimyim@aolima

yt tir yimyim

TAPAK 7

UWW-i Bajrang Punia nem tenokdangba agütsüogo

Russian nuclear forces teti saksalema lir: Putin



VOL. XXI ISSUE NO. 207 (ADOK 207)

DIMAPUR ROGONÜ (FRIDAY)

MONUPII (MAY) 10, 2024

₹ 5.00

Wokha-Doyang apu tashi gari kata mesenzüi atatsü

Dimapur, Monupii/May 09 (TYO): Wokha nung aliba NH-61 (Old NH-2) nung 81+200 Km tekalen lendong ajurutsüsa long nangdena aliba timtem makai agientsü mechi aser senzüsempongertem takum lendongi maitsü mechi May 11, 2024 nikongdang 4:00 ako nungi May 13, 2024 anepdang 7:00 ako tashi NH-61 (Old NH-2) Wokha/Mokokchung road nung APMC Wokha Town nungi Doyang apu tsüingta

(Mokokchung road) gari senzüsempongba ajunga nokdangtsü, ta Deputy Commissioner, Wokha, Ajit Kumar Ranjan, IAS ajanga sangdong ka nung metetdaksü. Iba tenokdangba mapang Wokha-VK-Mokokchung route nung jajaba/senzüba medium aser light vehicles tem 'O' Point- Wokha-Doyang-Sungro-Mamongtong-Alichen lenmang leni senzüa atatsü ajungshir, ta sangdong ajangasa ashi.

Tripura nung totzü agi anünger

Agartala, Monupii/May 09 (Agencies): Tripura nung totzü tebilemstü bentetstü asoshi meranga inyaker, ta Minister, Food and Civil Supply Minister and Transport, Sushanta Chowdhury-i ashi.

amteper lenmang balala bushir. Assam kübok Jatinagra area nung railway lenmang raksaba ajanga totzü agütsüba tsütsü nüburtem mangmangteper, ta Minister Chowdhury-i ashi.

Tawa Assam nung train ka lenmang alema aoba sülen Tripura-i osettsüset abenba train aitba nung kanga mejungi kongshi, aser state sorkari tensa azioktsü mechi Indian Oil aser Ministry of Railways den teka

Iba tebilemstü tekeratiba nung bentetstü asoshi Indian Oil den mapang shia osangtsüsang agiteper, ta pai ashi. Kasa mapang Chief Minister Dr. Manik Saha-ia Ministry of Railways den lenmang kar bushitar ta ashi.

Gol-i Birth and Death Registration Act, 1969 amends süogo

Dimapur, Monupii/May 09 (TYO): Linük tesem ajungalen nisung asoba aser asüba tenüing züluokba maparen shidak inyaktstü nükjidong nung Registration of Births and Deaths (Amendment) Act, 2023 ozüing kuma amshiba Ministry of Home Affairs, Government of India ajanga metetdaksüogo.

Medical Institutions: Shirsa kibur südir süaka, medical institutions ajaki 'cause of death' shia aliba certificate ka Registrar nem agütsütsüla aser anasatiba kinunger nem copy ka agütsütsüla.

Iba amendment ya Gazette of India nung August 11, 2023 nü adok aser October 1, 2023 nü nungi linük tesem ajunga nung mapa kuma amshia arur.

Timely Issuance of Certificates: Registration renemba sülen, Registrars temi tasoba mesüra tasüba tenüing züluokba certificate ya osang agütsür nem anogo tenet tsüingta electronic yimya mesüra danga yimya nung agütsütsüla.

Registration process tajungba aser tasenba kumdahtsütsü, shidak inyaktstü aser nüburtemi amshitstü mechi iba act nung tongtipang provisions kar inok. RBD (Amendment) Act, 2023 nung tongtipang temetstü kar yamai alitsü:

Centralized Database Maintenance: National aser state level nung registered births and deaths database bendentsü atema Registrar General of India aser Chief Registrar of States nem nungloktstür. Item database ya Central Government aser State Government nungi mepishiba mesüra temelaba agütsüba sülen danga databases amshiba ketdangstürtem nem amshidaksütsü akok.

Birth Certificate as Primary Proof: October 1, 2023 nü mesüra iba anogo sülen asor nisungtem atema official nungdak balala asoshi tasoba anogo aser tesem indang kuli sayutsüji Birth certificate ya dang alitsü.

Provisions for Special Circumstances: Iba amendment nungya lendongtsüdong mesüra tashidak wara jatetba mapang death registrations aser certificate agütsütsü atema Special 'Sub-Registrars' shimsü tashi dena lir. Adopted, orphaned, abandoned, surrogate, aser children of single parents mesüra unwed mothers atema registration maparen inyaktstü atema legal provision agüja lir.

Revised Authority for Delayed Registrations: Asoba mesüra asüba züluokba nung menurtem atema, registration atema totuyuba agütsür ketdangstür ya 'Magistrate of first class or Presidency Magistrate' ta aliba nungi 'District Magistrate or Sub-Divisional Magistrate or an Executive Magistrate authorized by the District Magistrate' ta melenshir. Iba den külemi Notary Public nungi affidavit amshia aliba melen tangbo self-attested document amshitsü.

Grievance Redressal Mechanism: Registrar mesüra District Registrar inyakyim mesüra totuyuba nung nüburtem timtem ajuruba atema grievance redressal mechanism den temerenshi ulushitsüogo.

Sorkari lateta aliba ozüing nung ajaki anidaktsüla

Dimapur, Monupii/May 09 (TYO): State nung Municipal aser Town Councils indang elections ya ozüing aser Act kübok talenba mesüra tetsükdaksü kecha makai timi agitsü, ta State Election Commissioner, Nagaland, T. John Longkumer, IPS (Retd) ajanga sangdong ka nung ashi.

qualification aser disqualification aser eligibility provisions ajak abensa shia lir.

Returning Officers ajaki pei districts kübok Municipal / Town Councils atema elections ya Nagaland Municipal Act 2023, Nagaland Municipal Election Rules 2023 nung mela aliba ama agitsüla.

Municipal aser Town Council Elections agitsü atema Government of Nagaland-i Nagaland Municipal Act 2023 ya ozüing kuma yanglu aser elections agitsü atema aser ajaki shidak inyaktstü mechi Nagaland Municipal Election Rules 2023 ya yanglu, ta pai ashi.

Nagaland Municipal Election Rules 2023 indang Rule 22 read with sub-rule (1), (3) and (4) of Rule 23 nung nisung kati vote agütsütsü mesüra election nung noksaktstü mesüra candidate ama shimsü atema tzüzüing-ozüing tejangja agüja lir.

Sorkar aser Commission ajanga lateta yuja aliba dak alaka danga telok/associations/municipality Wards temi vote agütsüba mesüra tang aser tarutsü nung Municipal / Town Council elections nung nokdaksü aliba temeden agientsüsa tzüzüing-ozüing yanglua lira itemji kanga junga meittstü aser election maparen nung tetsükdaksü aser mepetmesü mesüra mangatetep madokdaksütsüla.

Iba yongji iba Act indang Section 41, 42 aser 43 nung Municipal / Town Council Ward nung züingsem asütsü mesüra election nung vote agütsütsü atema senso ajak asoshi

Act, Rules mesüra Commission ajanga mapang shia teinyaktstü aser totuyuba agütsüba dak alaka telok/kija mesüra municipality Wards temi ozüing nung shia aliba den mapettsüsa mesüra election inyakyim nung tetsükdaksü ajurutsüsa established statutes, rules mesüra totuyuba nungi balaka inyaksangshira, tapet ozüing agi merenshistsü, ta sangdong ajanga ashi.

Nüburtemi item totuyuba sülen shidak anidaktsü atema nungdakba mera agitsü akok, ta State Election Commissioner ajanga metetdaksü.

Advisor Khamo-i dangar dak metaloka malitsü ayongzük



Advisor, CWAD and Taxes, Kudecho Khamo

Pai party nung lenirtem dang pei atema bilema inyakba nungi pila alitsü aser terenlok aliba lokti ka yangertstü asoshi yimjung aser temeimtep nung alitsü ayongzüka liasü.

Kohima, Monupii/May 09 (TYO): Brehostibarnü Advisor, CWAD and Taxes, Kudecho Khamo-i dangar dak metaloka malitsü aser pei sasa inyaka rongsenketzüng tsütsü pei peria alitsü ayongzük aser yangji entrepreneurship shilem lir ta ashi.

Advisor-i nüburtem dang sobaliba mesamadaksüi alitsü ayongzük dang, sobaliba ya tsüingsang, ken aser sübosolemstü kisüing masü saka ochi ashiba aser meranga inyakba sobaliba aser ajak madak Tsüingrem mezüing südaksüba nungdaker, ta ashi.

18 Chozuba Assembly Constituency indang Nationalist Democratic Progressive Party (NDPP) pur shisadokden aser Local Area Development Fund lemstüba sentong ka Phek district kübok Chetheba Town Hall nung agidang pai iba tayongzükba o ya jembia liasü.

Sen dak tamang akaba yimya melenshia Tsüingrem dak tamang akatsüla, meshiba melena agütsütsüla aser dangar dak metaloka aliba melena Tsüingremi agütsüba sempet nung metaloka alitsüla, ta Advisor-i ashi.

Entrepreneurship ya gol ka lir, koba ajanga rongsenketzüng ainba aser terenlok arakzüdaksür, ta pai ashi aser nüburtem dang entrepreneurship nung tetsüing ajemoktsü ajungshi, kong rongsen adoker aser alima ya entrepreneurs meyong lir ta ashi.

Nüburtem rongsenketzüng tsütsü yaritepa alitsü atema pai pa nukla ashi aser 'One Family One Project, One family One entrepreneur and One Family One Prayer Time' roadmap lemsatapa liasü.

Advisor Khamo-i ashi.

Khamo-i par constituency nüburtem dang lanur asüding

Nüburtem temoatsü aser teyari nung nenok asoshi inyaker ka ama nüburtemi aginüba ama inyaktstü mangdang tejangja yur bendanga agütsür inyaker, ta Advisor Khamo-i ashi.

Iba sentong nung Vepozoyi Theyo, Convenor, LADP Verification Committee ajanga sorkar balalai LADP lemsaba indang rateta ashi aser yim dak yimtsüing nung nüburtem dak kongshia LADP sen shidak lemstüba atema MLA aser Advisor Kudecho Khamo dang pelaba ashi.

Constituency nung terenlok agi anünga kumogo, anungji asenok yaritepa alitsü nungdaker, ta pai ashi.

Iba sentong nung Thepukrayi Nienu, General Secretary, 18 Chozuba AC menden liasü aser 18 Chozuba AC nung NDPP tir Vevohu Epao-i tarur pela agizükba o jembia liasü.

Iba den külemi Agri. and Allied inyakyim, lanur atema shisaliok aser saisapong, employment aser entrepreneurship tajungba kumdahtsütsü tongtipang lir ta shisem.

Sentong tenzüka Zapose Dawhuo, Pastor, Chetheba Town Baptist Church (CTBC) ajanga sarasadem aser sentong tembanga Mudonuyi Veswuh, Chaplain, 18 Chozuba AC ajanga sarasadema liasü.

KLC final year LL.B kaketshirtem DEF Kohima den attach sür inyaksü



Law kaketshir 62 den Addl. Director General of Police Sandeep Madhukar Tangadge IPS, SP Kohima Bharat Laxman Markad IPS, Administrator Limaakum Jamir aser BCI Practical Paper Incharged Asst Professor Kezhokhoto Savi nunger tangokba noksa nung angur.

Dimapur, Monupii/May 9 (TYO): Kohima Law College final year LL.B kaketshirtem Practical Papers nung shilem ka ama anogo 7 DEF Kohima den attach sür iyaksü asoshi tenzüksüba sentong may 9 nü College auditorium nung agiogo.

Sentong nung mendenbuba, teacher-in-charged Asst. Professor Kezhokhoto Savi-i, kaketshirtem nem tajangzük aketba course agütsüba atema police department dang kanga pelaba metetdaksü aser ashiba agi, iba ajanga kaketshirtemi police department aser talisa Police Station, traffic amala inyakyimtem tajungba angatetsü.

Paisa, kaketshirtem case diary, ken o benokba, PS record achaayangba, character & antecedent jangjashiba, general diary amala achaayangba tali jangja angazüksü aser iba den crime report kar danga lira

crime scenes tem semdangtetsü, temzüng ozüng dak sendakba nung tanga Police Station tem semdangtetsü, Foot patrols/MVCP amala nung shilem agitetsü, ta ashi.

Kaketshir 62 ya telok tilala kuma lemsatsüogo aser parnok May 9 nungi 15 tashi Honibar aser Deobarnü na densema functionaries balala semdangtsü.

Additional Director General of Police(Law & Order) Sandeep Madhukar Tangage IPS, shiba Law (LL.M) nung Master Degree degree ngua lir aser tang Law nung PHD tagidak lir pai, 'Criminal Justice System' onük dak ajemdaker kaketshirtem nem tangazükba agüja liasü.

Pai, temzüng ozüng dak sendakba nung tajangshiba aser shisatsü aika bena lir aser pai Police Station inyakyim aser traffic, women cell inyakyim

dak sendakba nung kaketshirtem den sensaksemba mapang tangazükba agüja liasü.

Kasa mapang nung Superintendent of Police, Kohima Bharat Laxman Markad IPS-i, kaketshirtem atema yanglutsüba anogo tenet atema course indang metetdaksü.

Sentong tatemi Administration Limaakum Jamir-i police department aser officers ana dakng kanga pelaba lemsatep, aser tarutsü nunga iba sentong ya benoka inyaksü nung ajungtsü ta shia liasü.

Maneni Limaakum-i kaketshirtem dang yimayimpong azüoka aser mapang shita amshia inyaksangshitsü aser ita ishika tsüngda legal practice asü tenzüksüba mapang teyari angutsü atema iba ya maongka tulu ka ama agitsü ajungshia liasü.

Kohima DC-i ali mekazüksü nüngdakba metetdaksü

Dimapur, Monupii/May 9 (TYO): Deputy Commissioner, Kohima office sangdong ka ajanga, 89 RCC (GREF): Kohima District kübok Jotsoma KM 10.175 nung Kohima-Pedi-Peren lenmang nung teti atema apu

yanglutsü atema ali 1360 Sqmt /14639 Sqft nüngdakba metetdaksüogo.

Anungji Nagaland Land Requisition Acquisition Act 1965 kübok Section 9 (2) nung ajemdaker Deputy Commissioner, Kohima District

Kumar Ramnikant, IAS-i tashi agüja aliba ketdangsur ka ama, temalen shisema aliba ali dak sendakba nung nisung/loti kari danga tashishiba lira osang sangdongba sülen anogo 30 tsüngda DC office dangi abentsü tetuyuba agütsüogo.

Global Open University Nagaland-i Seminar ka ayongzükba agiogo



Dimapur, Monupii/May 9 (TYO): Global Open University Nagaland (TGOUN)-i, 'The Scope and Career in Fashion Designing' onük nung ajemdaker Sozhulhou/Kozabe Village kübok University campus nung seminar ka ayongzükba agiogo.

Iba sentong ya April 9 nü agiogo aser tongti o jembir Theja

Sekhose, Proprietor & Director of TS Academy of Design liasü. Sekhose ya TGOUN alumnus ka lir aser pa University nungi BBA FD (Bachelor of Business Administration in Fashion Design) agia liasü.

Seminar mapang Theja-i, fashion industry nung career yanglutsü atema maongka balala

alibatem indang metetdaksü. Lanur designer tem den o jembiba mapang pai, maongkatem agitsü koda tongtibang iba indang lemsatepba den temulung sadem sadema lapoker pei jangraba inyaksü ajungshi.

Theja-isa, brand identity, collaboration, aser sustainability indang jembiba, koba designer tasen ka atema kanga tongtibang lir ta ashi. Paisa, sentong nung shilem agirtem dang pei nukla tem pei design kümdaktsütsü, aser industry nung ajaki teti bilemtetsü atema tangar dang nungi balaka inyaksü asoshi merangtsüla, ta ashi.

Iba seminar ajanga fashion design landscape melenshia aoba dak sendakba nung tangazükba agütsü aser Industry nung lenmang mesapoka aotsü atema tangazükba aser tajungshiba balala agüja liasü.

NBSE kübok rijutem nung e-cigarettes tenokdangba agütsür

Dimapur, Monupii/May 9

(TYO): Director General of Health Services, Ministry of Health & Family Welfare-i, NBSE kübok züngoksema aliba Institutions ajak tekolaktem dang, Prohibition of Electronic Cigarettes (Production, Manufacture, Import, Export, Transport, Sales, Distribution, Storage and Advertisement) Act, 2019 dak ajemdaker India sorkari electronic Cigarettes aser ibala mesükba device tem mamshitsü atema tenokdangba agütsüba metetdaksüogo, kechiyong e-cigarettes ya nüburtem aser talisa tanurtem health atema lendong lir.

Electronic cigarette mesüra vape ya device ka lir koba moko achiba den kasa aser idaki nicotine, lead aser cancer adokdaktstüba agent tem keta

lir. Educational Institution telung aser temeket nung electronic cigarettes ayokba aser achiba ya kanga junga meita atar nokdangtsüla, aser iba ajanga lendong bener arutsüba indang aser Act indang kaketshir aser tsayurtem nem tangazükba agütsütsü nüngdaker.

Kasa mapang nung school temi iba amala oset ya mapangshia meita aotsüla, ajita asünungdang iba amala oset amshiba aser ayokba nokdangtetsü.

Iba dak sendakba nung NBSE kübok züngoksema aliba school tem ajaki, iba amala oset amshiba nungi pila alitsü atema kaketshirtem nem tenüngdakba tetuyuba agütsütsü atema kasa sangdong ajanga mepeshia metetdaksüogo.

NSSBzüngsem mapa atema applicant tem jaoker

Dimapur, Monupii/May 9 (TYO): Public & Administrative Reforms Department, Nagaland-i, Nagaland Staff Selection Board Regulations, 2020 dak ajemdaker Nagaland Staff Selection Board (NSSB) züngsem mapa atema post ka tazüng aliba süngdaksütsü asoshi May 7, 2024 nü applicant tem Jaokogo.

Mapa atema apply asürtem ya public administration, public service, aser academics nung küm 25 bosa tajangshiba alitsüla aser parnok mapa inyaka aliba mapang disciplinary action kecha magi alitsü nüngdaker.

Terms of employment osang

tejangja NSSB Regulations 2020 nung angutsü koba Department indang website at dpar.nagaland.gov.in nung inokja lir.

Tejangrartemi Department indang website Annexure-I nung aliba biodata, service details, aser experience in the proforma benoktsü nüngdaker.

Application ya osang sangdongba sülen anogo 20 tsüngda benoktsü nüngdaker. Applicant temi parnok indang online applications tem official e m a i l : admreformsbranch@gmail.com ajanga benoktetsü.

Temetetsü tongtibang kaji iba mapa atema Nagaland nung lispourtemi dang apply sütettsü.

AR-i ayongzükba Yannu yimtsüng nung medical camp agi

Dimapur, Monupii/May 9 (TYO): Assam Rifles-i ayongzükba May 9 nü Mon district kübok Yannu yimtsüng nung medical camp ka ayongzükba agiogo.

Kinük nung aliba iba yimtsüng nung alirtem nem healthcare services aser tenüngdakba medical teyari agütsütsü nükjidong nung iba sentong ayongzükba agiogo. Temeket yimtsüngtem nungi densema tebur 32, tetsür 59 aser tanur 42 ta ajak senteper nisung 133 iba camp ajanga ajangzükogo.

AR-isa, camp mapang libaliro tajung aser general medicines dak sendakba nung lecture ka agüja liasü. Kinük nung aliba nüburtem atema iba amala sentong tajung ayongzükba katsüba atema nüburtemi AR dang kanga pelaba lemsatepa liasü.

Kasa mapang nung Assam Rifles-i Phek district nung merekmeju sentong ka ayongzükba agiogo. Nüburtem nem merekmeju dak sendakba nung tangazükba agütsütsü nükjidong nung iba sentong ayongzükba liasü.



Iba merekmeju sentong nung iba tesem nung aliba nüburtem aikati kanga jangrabangra shilem agiba nguogo. Nüburtem anema aser kümzükba toktsütsü atema merekmeju dak rangloker AR aser lokti tentet balalai iba sentong ayongzükba agia liasü.

Iba sentong ajanga nüburtem nem shilem agidaktstüba dang masü saka lenla ajak nung terenlok asoshi AR bendanga agütsür aliba tali jangjashitsür.



May 09, 2024 nü New Delhi nung AAP candidate, Kuldeep Kumar-i Lok Sabha election atema nüboyimdang tangokba noksa nung angur.

Election nüboyim atema shinga nem-a interim bail magütsü: ED

New Delhi, May 09 (Agencies): Brihostibarnü Supreme Court nung Delhi Chief Minister, Arvind Kejriwal-i interim bail atema temepishiba agütsüba ken o angadanga mapang Enforcement Directorate (ED)-i, election mapang nüboyimtsü temedenji tongtibang temeden mesüra linük temzüng kübok temeden ka masü, ta metetdaksü.

ajanga Supreme Court dang, election nüboyimtsü atema yimtenren lenir shinga nem-a interim bail magütsüdang; election nung metoktepyonga nüboyimtsü atema interim bail magütsü, ta metetdaksü. Bodhbarnü Justice Sanjiv Khanna leniba bench-i Kejriwal temepishiba ken o angadanga mapang nung, "Onoki Hokolbarnü interim bail indang obendang agütsütsü. Kasa anogo nungjisa (Kejriwal) apuba anema

benokba ken o-a angadangtsü," ta metetdakja liasü. Delhi excise policy ken o dak sendakba nung March 21 nü Aam Aadmi Party (AAP) tongti lenir, Kejriwal pua liasü aser tang pa Tihar Jail nung judicial ket nung lir. May 7 nü Justice Sanjiv Khanna aser Justice Dipankar Datta nati akümba bench-i Kejriwal-i bail atema mepishiba ken o dak sendakba nung obendang magütsüteti liasü.

Canada-i India nung asem anema kuli melemsatop: MEA

New Delhi, May 09 (Agencies): Brihostibarnü Ministry of external affairs (MEA)-i, Hardeep Singh Nijjar khasetba ken o dak sendakba nung India nung asem pua lir, ajisüaka Justin Trudeau-i aniba Canada sorkari par asem anema kuli India den melemsatop, ta metetdaksü. Osangbenertem den jembidang MEA otongdar, Randhir Jaiswal-i, "Canada-i nisung asem apuba osangji onok nem metetdaksüogo, ajisüaka parnoki iba dak sendakba nung kuli kecha melemsatop," ta metetdaksü.

"India aser Canada na tsüngda o lemtepdar. Onoki parnok dang, nenoki separatists, alia oa inyakertem aser rara adokdaksürtem nem yimtenren tsütsü maongka agütsür, ta ashir. Onoki parnok dang nisung aika India nem agüjang ta shiogo. India ketdangsertem amokmerenba aser mapa sadema meinyakdaksüba tebilemstü onoki parnok den lemsatopogo," ta paisa shisem. Yaküm Canada nung Sikh nung Seperatist lenir, Hardeep Singh Nijjar khasetba ken o dak sendakba nung anogo

ishika tejaklen Canada-i India nung asem pua ken o benokogo. Nijjar tepsetba ken o dak sendakba nung India aser Canada na tsüngda tesendaktep raksaa lir. Yaküm June ita nung Vancouver nung Gurudwara ka kima mejangjaba nisungtemi arrshi küm 45, Hardeep Singh Nijjar khaset. Pa ya Canada senso liasü aser Sikh nung temeja lima 'Khalistan' atema takhangba agütsür lenir ka liasü. 2020 küm India-i Nijjar ya kiralongrar ka, ta sangdonga liasü.

Tamil Nadu nung firecracker factory ka nung nisung 8 pokseta asü

New Delhi, May 09 (Agencies): Brihostibarnü Tamil Nadu nung Virudhunagar district kübok Sivakasi anasa firecracker yangluba factory ka nung mi adoka firecrackers apokba lendong nung nisung ti süogo, ta ketdangsertem metetdaksü. Iba lendong nung factory nungji inyaker tetsür pongu aser

tebur asem asü. Firecrackers riziünga aliba takdang tenet meshimeshia rongdok, ta police ketdangsertem metetdaksü. Police aser fire service sepaitemi iba lendong nung yirurtemji Sivakasi nung aliba sorkari hospital-i anir aoba sülen treatment agidar. Miji kodaser adokar tang tashi nungbo mejangjar; iba factory ya

licence aliba factory ka lir, ta kasa osang ajanga metetdaksü. Iba lendong atalokba osang angashiba sülen Tamil Nadu Chief Minister, M K Stalin-i iba lendong nung asür kinüngertem den mangyim jashi lemsatopba den külemi district ketdangsertem dang yirua alirtemji tajungtiba nung yariang, ta tuyuogo.



May 09, 2024 nü Kolkata nung CPI(M) züngsemtemi Lok Sabha election nung party candidates atema nüboyimdang tangokba noksa nung angur.

BJP-i Muslim reservation agientsü aser SC/ST nem agütsütsü: Amit Shah

Bhongir, Monupii/May 09 (Agencies): Brihostibarnü Union home minister Amit Shah-i, BJP-i sorkar kümra Muslim nung nem agütsüba reservation anentsütsü aser ibaji ST, SC aser OBC nüburtem nem ang agütsütsü, ta metetdaksü.

Congress lenir Rahul Gandhi aija Shah-i, "Onok indang manifesto nung onoki Modi t e n a n g z ü k b a t e m metetdaksüogo; pai kechi jembidir ibaji inyaker. Rahul tenangzükbatebo anü ai tashi nungbo samar," ta shi.

Telangana state kübok Bhongir nung election nüboyim sentong ka nung jembidang Amit Shah-i, "Congress-i tiyazü jembia election nung tokteper. Parnoki Ato kilonser Narendra Modi-i maneni takok ngura pai reservation anentsütsü ta jembir. Tesüiba küm 10 tashi Ato kilonser, Modi-i linük anir ajisüaka pai reservation manentsü. Ajisüaka Congress party-i SC, ST aser OBC indang reservation auyaba sülen Muslim nung nem reservation shilem 4 agütsür," ta shi.

"Rahul Gandhi-i aluyimertem dang loan sentsüh atoktsü nangzüka liasü saka pai yamaji meinyak. Pai aluyimertem nem sen 15,000 agütsütsü nangzük saka meinyak," ta Shah-i ashi.

Paisa, "2019 küm Telangana nung nüburtemi onok nem menden pezü agütsü. Tan election nungbo onoki Telangana nung Lok Sabha menden 10 dang nungi teimba angutsü. Telangana nung züngya ana (double digit) angubaji ajanga Ato kilonser Modi-i menden 400 dak tema ngutetsü. BJP nem menden 10 dak tema nung takok ngudakjang. Onoki Muslim reservation anentsütsü aser SC, ST aser OBC teimba kümtsütsü," ta nangzük.

"Pai (Rahul Gandhi) kaketshirtem nem loan sen lakh 5 agütsütsü nangzük saka meinyak, tetsür kaketshirtem nem scooty agütsütsü nangzük saka meinyak. Pai Taluka ajak nung International School lapoktsütsü ta nangzük, saka meinyak. Congress-i nangzükba ama meinyaker saka Modi-ibo nangzükba ajak inyaker," ta paisa metetdaksü.

Amit Shah-i, "Congress, Bharat Rashtra Samithi (BRS) aser All India Majlis-e-Ittehadul Muslimeen (AIMIM)-i Citizenship (Amendment) Act (CAA) anema nokdak, parnoki Quran nung ajemdaker Telangana yimsü süner, parnoki Triple Talaq tanaben benokner. Parnoki Pran Pratishtha sentong nunga shilem magi," ta metetdaksü.

May 13 nü Telangana nung Lok Sabha menden 17 prongla atema election agitsü.



May 09, 2024 nü Krishna district, Andhya Pradesh nung police-i truck ka nungi sen crore 8.5 apuba sülen sen azüngdang tangokba noksa nung angur.

BJP-i Delhi nung Congress office anasa longkak ait

New Delhi, May 09 (Agencies): Brihostibarnü BJP lenirtem aser party nung inyakertem Delhi nung Congress party headquarters anasa longkak aita Sam Pitroda-i jembiba o atema Rahul Gandhi densema Congress lenirtemi tatok meshitsüla, ta takhangba agütsü.

lenirtemi nisung bendanga züngshiba otem jembir," ta shi. Longkak aitertemisa linük nung alirtem aser bendanglen alir India nung mezüngmeshiba atema Rahul Gandhi densema Congress lenirtemi tatok meshitsüla, ta takhangba agütsü.

Osangbenertem den jembidang Delhi BJP Tir, Virendra Sachdeva-i, linük nung nisung temeyokteper tapu balala litetbaji India indang tashi tulutiba lir, ajisüaka Congress leniri nisung bendanga jembiba o ajanga asen linük telongjem raksatsür, ta shi.

Pitroda-i jembiba o ajanga mangatetteper tulu adokba sülen Bodhbarnü pai Indian Overseas Congress Chairman menden nungi anenogo.

Paisa, "Pitroda-i jembiba o ya ajungbena jembiba o lir. Lok Sabha election shilem tasembuba agiba sülen parnok (Congress) jenjang majungba meteta tangbo Congress

Tawa interview ka nung jembidang Pitroda-i India nung nisung tapu balala aika tesünep nung litetba dak sendakba nung pai, India nung anüolen tip tsütsü (South) alirtemji Africa nung mesük, anüolen tsütsü alirtem Arab nung mesük aser anüdok tsütsülen alirtem China nung mesük, ta jembia liasü.



TIR YIMYIM YIMOBILEM (EDITORIAL)

DIMAPUR ROGONÜ, MAY (MONUPII) 10, 2024

Süpu aadang sürem shisa

Alima nung Naga lima yaa takar limatem rongnung ka lir, kechiyong Tsüngremi Naga lima nung ya senti rongsen jenti aremokja lir. Aji oda, ali tema nung akaba süng aser long agir magima aliba rongsentem ya yutsür, ano ali telonglena totzü aser mijang kisüng agi Naga nung takar küma alitsüsa ali rongsen jenti Tsüngremibo asenok asoshi rezüngja lir. Ajisüaka, asenoki itemji timi agiteta mamshitetba agi alimabo takar ser nung asenoksasa asenok timtema alir. Iba ama takar lima nung asenok sensaka aliba ya kuli aika lir saka aika rongnung kuli kaji, asenoki asenoksasa ali tema aser telong nung akaba rongsen bushiteta agi mashi aser bushitetyonga asenoki süpu aadang sürem shisa ama, ka agiteta agidang asem raksatsür. Iba kuliji asenoki ali telong nung akaba mijang, nakmati, tuteta agiba mapa ya asütsü. Asen lima nung asenoki ali mijang tutetba yimya ya koya longki ama tupoka aier. Ibayongji, English oshi nunga iba dang ya 'rat-hole coal mines' ta ajar. Meghalya nunga tamalen küm aika koya longki ama tua ali mijang atuba mapa ya kanga sashia inyaka liasü. Ajisüaka, iba ama mapa yagi alima nung tajangzük dang nungibo takoksa aser timtemang teimba bener arutsüba reprangteta küm ter tejaklen National Green Tribunal ajanga anentsüogo. Iba mapang nung Meghalaya nung East Jaintia Hills District kisüng nung ali mijang atuba ongkenji meyrirjang metsür trok liasü aser tang tashi item ongkentemji ali tasen enoka menembangi lapoka dang lir. Iba jagi nisung aser shirurutem na prongla asoshi takoksa lendong bener arutsür. Atangji, ali mijang atuba ongkenji ali tasen agi süngdonglidong meyitsüsa akhi ama kümdakja nembang meyutsüra item ongken nungji nisunga aser shirurua asongta lendong ajurutsü. Ibaji dang masü saka takoksa tulutibaji ali mijang atuba ongken nungji miim aketba tzü (acidic water) mouteta ayimba agi iba tesem aser temeket nung aliba süngdonglidong ajak süa adoker, anungji ali mijang atuba agi iba temeket alir yimtsüngtema dena parnok li nung alu ayimtsü makok akümer aser temeket ayongtem ajak tasü tzüim ama takumbo kecha melitetsüsa kümdaktsür. Iba ama ali mijang atuba agi rongsen tera ajangzük dang teti asoshi ali aser ayong raksaba takoksa aser timtem nungji kümzüksü asoshi tanga state-tem nungbo National Green Tribunal aser Geology & Mining department ajanga kanga temulung agüja anepalur. Iba amaji asen lima nunga anepaludar asütsü imlar. Joko, asen lima nunga tesem aika nung ali mijang atuba anasa aliba ayongtem aika menendokdagi aser ali mijang atudak nungibo talangka pilar ser nung ali mijang atuba ongken nungji adokba miim aketba tzü yimshia aoba ajanga süngwa aser süngjanglijang lu aika süadokba angur aser angashir. Ibaji asen lima makyonga aruba arrsaongoktsüba osang amato asenoki kanga süoki ia agitsüla. Ali tema nung süli, telonglen süli, Tsüngremi moaja aliba ali rongsen ajakji asenok agitsü asoshi yutsüba temoatsütem lir, anungji magibajang takoksa. Ajisüaka, rongsen ka agiteta agidang, tang amaji tanüngba rongsen ajak kodanga mamshitetsüsa menenadoktsüsa inyakra, ajibo süpu aadang sürem shisaba takoksa dang nungji tuluba asütsü. Asenoki asen agitsü mapa ka inyakdang, teti temulung nung bilema inyaktsübaji asenok ya tarutsü putu asoshi alima yanglutsür kaka ta bilema inyaktsüla. Aji oda, tanü asenoki atemba süngdonglidongtem nungji asenok tajangzük agia alima nung malitsüa akok, saka asen chirnur aser parnok chirnurtembo tanü asenoki tema aser wazüka yutsüba süngdonglidong aser ali rongsentemji agia anisüngzüka alitsü. Kasaji, tanü asenok ali tema aser telong nung akaba rongsentem bendena janratema aliba ya asenoki inyakba aser rezüngba agi masü saka asen tsüraburtemi apayua asenok asoshi anepalutsüba aser wazüka yutsüba rongsen aser temoatsütem agia alir ta asenoki angatetsüla. Aji oda, tanü alima atemer amai bilema tarutsü atema mebilemi inyakra, asenoki asen chirnurtem asoshi alima nung molumi yanglua toktsür aoer asütsü.

OLEMSABANG

Aotsür Aor libaliro khen meyipa reprangshitsüla

~ L. Kika Pongener.

Asenoki tesuiba putu otsüla oboula nung nung mapang nungji, asen Ao kin sobalibaa lia aruba otsütemji meyipa reprangdangra, kanga-sa tesasatsüka asen o asen na, yim o yim na tsüngda tekolak (Mangko) bushitepa, yimtsüng kati yimtsüng ka den tsükchitepa lia aruba otsütem angazüka aru. Yongji, tanü tashi asen Aor tsüngda telongjem kati arutsü (Common Front) makoker asü (?)...ta bilemer. Ajisuaka, tia kaa America lima nungji Tenyar Dr. Clerk asen limai arua Yisu yimsu osangtajung sayua nuji kümdaktsüyong, iba tekolak bushitepba sobaliba tamajungji anendaktsü. Ajiser, lia arudang, Naga nung India nung nungji nujiso bushitsü mezüng tenzük dang, mezüng linuk tenzük rongnung asen Aor-a atongsema oboula Late. Imkongmeren-i anir lennir tajung aikati tongti shilem agia tenzüka aruba otsü angazüka aru. Iba mapang linuk tenzükertemji tanü amai telok (Faction) aika masü tongmelang ka dang liasü. Ajisuaka, tesasatsüka, tanübo linuk tenzük telok aika küma lemsaogo. Surabang, linuk tenzük telok paika nungji, asen Aor samanir (Pioneer) kin-jia telok ka nungbo tekolak lir mali...???...ta khen shisadangdi. Ni aibelener ka mesura, telok paika nung ya asen Aor tekolakbo kata mali ama bilemer. Surabangla, tanübo Ao kin-ji lenla ajak nung samanir kin ta jembitsübo tera numa-medangi akseta bilemetsüsa jenjang ka kümogo ta bilemer.

Ano Nagaland State mangudang 'Interim Body' kati yimsu asüba mapang, asen tsürabur lennir Late P. Shilu Ao, Executive Counsellor sur anir aruogo. Iba sulen State kümer külena pa-sa Chief Minister sur yimsu sua aruogo. Ano iba sulen asen lennir Dr. S. C. Jamir asemben-pezüben tashi Chief Minister sur Nagaland sorkar anir aruogo. Aji oda, asen Aor Chief Minister sur anir arudang sorkar mapa (Govt. Service) nung aniokba nunga suang, terenlok mapa (Development) nunga suang, kechisarena lenla ajak nung, Naga nung kintem rongnung tanak-temesung kecha tebendang meli-i küsa-sa shilem atadakja yimsu sua aruogo, oda lisopur dang masü tzüma-longmar dena mesentoki shilem atadakja yimsu sua aruba ngua aruogo. Iba sulen Political Party balala aser lennir balala-i melentepa yimsusua arudang, tanübo asen Ao kin kechi jenjang nung nokdaka lir (?)...ta khen shisadangdi. Tesasatsüka, tanübo asen Aor Chief Minister atatsü-bo yutsür, Cabinet-a number ana-asebo matatsüsa jenjang ka kümadokogo. District-wise Sanction lemsaba nunga Mokochung District-bo tangar dang tajemba lemsaktsüsa jenjang ka kümadokogo. Indian Parliament nung Member ka asütsüa Aor-bo langa liaka meshimtsüsa jenjang ka kümadokogo. Aji oda, tang iba sorkar mapang, Constituency Delimitation mapa inyakra, Mokochung District nung Constituency-10 akaba ya kar luzüka bener oa tanga nung zükloksütsüa shibai metet...??? Aji oda, iba mapa nung tanir aser tongti shilemji tang Lok Sabha nung shiba MP mendir paji tongti sur inyaktsüa shibai metet...??? Ashiko, tangar kinbo iba atemaji tang Lok Sabha Election nung-to longjemer merangtepa inyak asütsüa shibai metet...???

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Winter Jam 2024 nung lanur 34,000-i Yisu Khrista agizük



May 09, 2024: Taküm Winter Jam Christian concert tour nung lanur 34,000 dak temai Yisu Khrista agizükogo; Generation Z lanurtemi ochi atema tzüurar, ta tour pastor-i metetdaksü.

1995 küm tenzükba Winter Jam ya küm shia yimti balala sema kenten sentong ayongzüka agiba sentong ka lir. Taküm iba tour nung Crowder aser Lecrae densema Khrista osangtajung kentener 10-i shilem agia liasü.

Winter jam concert ticket ji dollar sen 15 dang lir.

Aonung shia kenten sentong tom nung tour pastor, Zane Black-i Tsüngrem O tatsütsü jembir. Taküm Winter Tour nung nisung 34,000 dak temai Yisu Khrista agizük aser online ajanga tenüing agütsürtem tang

mezüing local Arogotem nung züingokdaksüogo.

Generation Z lanurtemi ochi/atangji atema tzüurar, ta pastor Black-i ashi.

"Lanurtem taila agi meketbanga lir. Digital putu ajanga parnok AI (Artificial Intelligence) tsütsüleni talangka oadokogo, ibayongji parnoki ochi atema tzüurar. Taila putu ka nung ochi lemsateptsü atema Arogo asoshi maongka lir. Tsüngrem atangji lir. Kaket ka lir, aser ibaji ochi kaket. Taküm melenshitsuäa temeim ka lir," ta pastor Black-i ashi.

Sobaliba tamajungba-tamajungba akümba amaji nisungtemia ochji atema taliba-taliba tzüurar, ta pastor-i ashi.

"Generation Z lanur Khristantem aikati

medemertem den Khrista indang lemsateptsü jangrar," ta paisa metetdaksü.

"Winter Jam indang nükjidong ana lir; mezüingbubaji osangtajung lemsateptsü aser tanabubaji tamangertem ajungmesotsü atema lir. Concert nung adener tamanger lanurtemia parnok meketa reprandang parnok kija masü saka tamanger aika lir ta jangjar," ta pastor-i ashi.

"Yisu Khrista dak teimla aser Tsüngrem O nung ajemdaker onoki 'Tsüngremi nenok meimer, na shimtet, na nükjidong ka yur yanglu, tesüiba mapang na koma liasüar liaka Tsüngremi na meimer' ta parnok dang ashir. Generation Z lanurtemi iba atemaji tzüurar," ta paisa shisem.

ANOGO ABEN TSÜNGREM DEN

Tenla agütsütsü tashi angaba


"Kibuba o tashi angaba nung pelaba teka, tarongba tenla aser tetepsetba tenla tenladak Kibubai tepela ali asü?" (1 Sam 15: 22)

Laishiba nung Saul chubaji tashi mangar süngyanglu ama nokdaka lir. Amalek nunger den raradang pai tesadang ka tashi anga. Mabensai tashi angabaji tashi mangaba den sako. Pai Kibuba ozüing anema kiset shiruru teyiratem tashi pa atema ayu. Kodang ainakar Samuel ajanga aji ashi, Sauli aji Kibuba nem tarongba tenla agütsütsü asoshi ayu ta ashi. Idangji Samuel-i pa dang ashi: "Kibuba o tashi angaba nung pelaba teka tarongba tenla aser tetepsetba tenla tenladak Kibubai tepela ali asü? Ajiang, tashi angabaji tetepsetba tenla dang nungi tajungba, aser o angabaji san tepung temo dang nungi tajungba." (1 Sam 22,23) Pa den aseni mulungba agi küptepba agi Kibuba jashitaksüba dak alema tanga kechaia pa mezüingmeshi masür.

Tebu den tenangzüktepba yur Khrista alimai aru: Aji asünung kodang Pa alimai arur ashir, tenla aser tenlaba nai maginur, saka ni asoshi temang ka nai renemogo. Ajiang ni nai mulungba inyaksü arua lir" (Ibri 10:5-9). Ozüingi melaba ama tenlaji agüjaka iba jagi tashi angaba melentsü makok (t.8). Khrista temang kangki nung tenlaba jagi Tsüngrem dang bendanga aguja tashi angaba sayur (Ef. 5:2).

Tsüngrem kü dak tashi angaba mulungjang adokdakjang aser ne ozüing raksatsü tsübudakjang.

US Capitol nung sayutsüngir Billy Graham indang kürakyanglu sayatsü



May 08, 2024: Alima nung kanga nüngtugu sayutsüngir, asür Billy Graham nem akhüm agüja U.S. Capitol nung aliba Statuary Hall nung pa indang kürakyanglu ka sayatsü.

Billy Graham ya 2018 küm arrshi küm 99 asüandang asü.

Taruba hopta Washington DC kübok US Capitol nung America nunger 200 nem akhüm agütsütsü aser parnok rongnung sayutsüngir Billy Graham densema lir.

Taruba Brihostibar (May 16) anüandang 11:00 ako nung Billy Graham indang kürakyanglu sayatsü. Iba sentong nungji osangtajung kentener Michael W. Smith, House Speaker Mike Johnson aser Congress züingsemtem adentsü, ta Billy Graham Evangelistic Association (BGEA)-i sangdong ka ajanga metetdaksü.

Yongmen in agi yangluba kürakyangluji Billy Graham asoba tesem Charlotte, North Carolina nungi artist kati yanglu. Kürakyangluji süklep (feet) tenet talang lir. Pai akumli piyong sayutsüngia jajaba temaitsü pai Laishiba ka lapoka

Laishiba nungji rangloka kürakyangluji yangluogo.

Kürakyanglu tamendakdak nungji Yohan 3:16 aser Yohan 14:6 zülua lir aser "Yisu Khrista osangtajung sayutsüngir' ta zülua lir.

2013 küm North Carolina General Assembly nung Graham ya "Tesabutiba Jabaso" ta vote agütsütepa shimteta liasü; iba sülen 2015 küm taoba mapang Governor, Pat McCrory-i House Bill 540 nung sign süa Graham indang kürakyanglu yanglutsü telemtetba agi.

"North Carolina nunger nüngtugu aika lir, ajisüaka Billy Graham-i alima nung nüburtem jenti taküm nung kongshiba amabo kar dang liasü," ta House Bill nungji shia lir.

Senator, Ted Budd-i sangdong ka ajanga, "Rev. Billy Graham-i sayutsüngibaji Yohan 3:16 nung ajemdaker tongmelang agi tai atokba nung amendaka lir. Pai akumli piyong osangtajung sayutsüngitsü atema telemtetba agi, meimchir temeden atema rara, pai communist anema nokdak aser nisung million noklang aika nem

tanela chiyungsü agütsü," ta metetdaksü.

"North Carolina nungibo pa nem mezüingbuba United States Capitol nung akhüm agütsür," ta Budd-isa metetdaksü.

Billy Grahama'er jabaso-Billy Graham Evangelistic Association nung Tir aser Samaritan's Purse nung CEO, Franklin Graham-ia tebu nem akhüm agütsüba atema pelaba lemsatep.

Franklin-i, "Iba ya akhüm tulu lir aser kübuia pelatsü. Iba denji külemi pai iba akhümji maginütsü saka Tsüngrem jabaso, Kibuba Yisu Khrista nem agütsünütsü," ta ashi.

2018 küm Billy Graham arrshi küm 99 nung asüba sülen U.S. Capitol Rotunda nung akhüm agütsüba America nunger rongnung pezüububaji pa liasü. Pai küm 80 shi Tsüngrem tenzük, US Tir 12 nem counseling agütsü aser linük/territories 180 nung nisung million 215 matsüngdang sayutsüngia liasü, aser ibaji putiotsü nung sayutsüngi ajanga nisung teimtiba ayimjembra lir.

2013 küm pa arrshi küm 95 ajungba anogo nung pai America nungertem den tatembangbuba jembia liasü. Iba mapang nungji pai America nung tanela jenjang majungba atema sasaba olen ka nung, "Mapang kaka nungbo ni ajep, kechiyong ni yimti ka nungi ka semdangba mapang nung nüburtem aika Tsüngrem nungi talangka pilaba ni angu," ta metetdakja liasü.

Pakistan nung court obendang ajanga Khristan tetsür ka chiok



May 09, 2024: Pakistan nung court kati Khristan tetsür chanu ka aser la puer aosang Muslim nunger ka na kiyimba thinentüsügo.

2019 küm Pakistan kübok Gujrat district nung arrshi küm 17 Khristan, Reeha Saleem school-i aoba mapang nung lar kiyong Muslim nunger kati la puer aoba sülen kangshia Islam yimsü dangi meyipdaksür la den kibong aküm.

Iba mapang nungji Reeha ya kaketshir ka dang liasü. La ita ana tashi aliba sülen lai jena aruteta liasü.

Pattoki, Pakistan nung Family Court-i Reeha pusema obendang agütsüogo. Lai melunga kibong akümba masü aser la kiyimba certificate nungji la nem sign südaktsübaji

kangshia sign südaktsüba lir, ta court-i metetdaksü.

Court nung Christian legal firm Alliance Defending Freedom (ADF)-i Reeha pusema liasü.

ADF International advocacy in Asia director, Tehmina Arora-i, "Reeha kangshia kibong kümdaktsüba court-i thinentüsüba atema onok pelar," ta ashi.

Arora-isa, "Puer aoba aser kangshia kibong kümdaktsüba timtem ya tetsür shingaia nem majangshidaktsütsüla. Iba dak alia kangshia tamangba yimsü mesendokdaksütsüla. Reeha kangshia kibong kümdaktsüba thinentüsübaji ajanga Pakistan nung kasa timtem ajangshir tetsür meyirjang aikati teimla angutsü imlar," ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Süngolio

(n) süngo tu tapu balala (variety of green leaves)

*Tang Monupii ya süngolio tasen meyitetba mapang lir.

Sünpak

(n) süng rangsaba tapak (plank)

* Sünpak agi süngden aser menden yanglur.

OLONG PAITEP # 6782

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6781 TELANGZÜBA

TIPIEN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

Assam: Boko nung heroin bener nisung ana apu



Guwahati, Monupii/May 9 (Agencies): Brehostibarnü Guwahati nungi kilometer 50 shi pilar Kamrup kübok Boko tesem nung police-i temesepba mozü ayoker nisung ana puogo.

Temesepba mozü ayoker ana ya Assam Police Special Task Force (STF)-i pua liasü. Tenati herion bena liasü.

Police source kati ashiba agi, aija alirtem ya osang tejangja ka angazükba pua liasü.

Itangitertem nungi osang tejangja angazükba sülen meita aoba mapang temesepba mozü ayoker ana mena aliba gari ya police temi sota liasü.

Gari sota bushisüngdangba mapang police temi heroin asütsü ta temulung melemi

bilemba temesepba mozü gram 420 talep 30 nung seper lia nguteta liasü. Temesepba mozü ya shishilembadak sen crore 3 dak tema asütsü.

Aija alir ana ya Kabel Uddin (33) aser Sabur Ali (52) ta jangjaogo. Tenaprongla Barpeta kübok Goroimari tesem nungi lir.

Aija alir ana den tena ket nungi apuba temesepba mozü aser gari police nem bendanga agütsüogo.

Police sources-i ashiba agi, temesepba mozü ya kanga sangra-a steering console nung miima bener liasü.

Temesepba mozü shibelenba tera jangjatsü atema police temi maneni ken o bushisüngdangdar.

Mizoram CM-i Indo-Myanmar arrtsü atsütsü aliba anemer

Aizawl, Monupii/May 9 (Agencies): Mizoram chief minister Lalduhoma-i Bodhbarnü, Mizoram aser Myanmar na arrtsü km 510 aliba ya atsü matsütsü asoshi Centre-i temelaba agütsütsü imlaba lemsatepogo.

Zo Re-Unification Organisation (ZORO) lenirtem den Aizawl nung sensaksemba mapang Lalduhoma-i, Centre-i kidanger linük den tang benoka aliba Free Movement Regime (FMR) ya magintsütsü imlaba lemsatep.

Lalduhoma-i, ZORO lenirtem dang ashiba agi, pai Ato Kilonser Narendra Modi, Union Home Minister Amit Shah aser centre nung tanga lenirtem den sensaksemogo, aser parnok dang Indo-Myanmar arrtsü Mizoram section bo meshibangtsütsü atema temepeshiba ka agütsüogo.

Paisa, Ato Kilonser aser Home Minister dang FMR magintsütsü atema mepeshia asüngdangogo, ta metetdaksü.

Aizawl nung amenkaker aliba Zo Re-unification Organisation (ZORO) ya Mizo nung telok ka lir, aser iba telok yagi India, Bangladesh aser Myanmar nung aliba Chin-Kuki-Mizo-Zomi kintem administrative unit ka kübok longjemdaksütsü meranger. Parnoki ashiba agi, Centre-i Indo-Myanmar arrtsü atsübangtsü aser FMR agintsü telemtetba agiba anema May 16 nü Mizoram-Myanmar arrtsü kübok Zokhawthar aser Vaphai tesem nung rally ayongzüka agitsü.

Centre-i Indo-Myanmar arrtsü atsübangtsü aser FMR agintsü telemtetba agiba anema ZORO-i January ita Aizawl nung Union Home Minister Amit Shah indang noksa rongtokja longkak aiba sentong ka ayongzüka liasü.

Mizoram aser Myanmar kübok Chin state na tsünga arrtsü km 510 lir aser Mizo nung aser Chin nung tetsütebou mapang nung tesendaktep lir.

Chin state nungi tang nisung 34,000 dak tema Mizoram kübok tesem balala nung jenoka lir, ta state home department-i metetdaksü.

2021 küm February ita military-i sorkar atsünga sülen Chin nungertem pei ki toktsür jenshia liasü.

Mizoram sorkar, lokti tentet balala aser kaketshir lokti tentetemi, Centre-i Indo-Myanmar arrtsü atsübangtsü aser FMR agintsü telemtetba agiba anema arudar, kechiyong iba ajanga linük ana nung kintem tsünga tesendaktep minprongtsü ta parnoki bilemer. Iba dak sendakba nung Mizoram assembly-i February 28 nü bangzüng ka agizükogo.

MENUNGRA BILEMTETTER



10.05.2023 ~ 10.05.2024

*Tsürabur asür **IMKONGYAPANG LONGKUMER** alima nungi pilar tanü küm ka ajungba menungra bilemteter.*

- Temeim Kinüngtsü, Chirnur aser Kinünger.

NGT-i Assam sorkar dang telangzüba meshi

Guwahati, Monupii/May 9 (Agencies): Assam sorkari tawa National Green Tribunal (NGT) nem agütsüba affidavit nung ashiba agi, wildlife sanctuary ka aser iba temeket arem nung school tem, km pongu talang lenmang ka, süngolu ka, tzübo aser polling stations tem amenoka aliba ngutetogo.

Tawa NGT-i, Assam chief secretary dang, Forest (Conservation) Act, 1980 anema iba tesem nung ki aser lenmang balala yanglutsü atema temelaba agütsüba ketdangsür indang osang tejangja meshia tetuyuba ka agütsüogo.

"2017 küm nungi ozüng alema inyaksangshiba atema principal chief conservator of forest (PCCF)-i kecha jenjang magiba indang rasa shia affidavit ka benoktsüla," ta judicial züngsem, Justice B Amit Sthalekar aser expert member Arun Kumar Verma nati May 2 nü NGT indang tetuyuba agütsüba nung shia lir.

Assam nung Sonitpur district kübok Sonai Rupai Wildlife Sanctuary (SRWS) nung Forest (Conservation) Act anema sorkari kisüjensüba aser ozüng alema tangartemi ali atsünga dak sendakba nung Dilip Nath-i taoba küm ken o ka benoka liasü.

Assam sorkari taoba ita affidavit ka benokogo aser ashiba agi, SRWS aser Charduar Reserve Forest (CRF) nung school aika inyaksangshidar aser nüburttem non-forest inyakyim dak sendaka lir.

Sorkarisa, item school tem indang management committee anema local forest ketdangsürtemi first information report (FIR) ka benokogo, ta metetdaksü.

Affidavit nungsa state irrigation department-i ozüng alema CRF telung nung Siloni

ayong nung luice gate ka yangludar, ta shia lir.

Kasa mapang nung nisung kati iba arem nung süngolu ka tenzükogo.

Iba den bendenloksema contractor kati Wildlife (Protection) Act and Forest (Conservation) Act anema SRWS telung nung km 5 talang lenmang ka yangluogo aser pa anema ken o ka benokogo.

Tang tribunal-i, Union Environment, Forests and Climate Change Ministry dang hopta pezü tsünga counter affidavit ka benoktsü tetuyuba agütsüogo, aser affidavit nung ozüng alema kisüjensütsü atema temelaba agütsüba ketdangsür anema jenjang agiba aser item kiojentem agintsü asoshi jenjang agiba indang metetdaksütsü tetuyuba agütsüogo.

Tawa Ministry of Environment, Forest and Climate Change (MoEF&CC)-i Assam sorkar dang Sivasagar district kübok Assam-Nagaland na arrtsü nung forest indang ali tanga mapa atema amshiba asoshi osang ka agütsütsü tetuyuba agütsüogo.

April 25, 2024 nü Assam indang Additional Chief Secretary (Forests), Suneet Bhardwaj dangi yokba shiti ka nung MoEF&CC nung Assistant Inspector General of Forests dang Sivasagar district nung commando battalion camp ka amenoktsü atema Geleky Reserve Forest nung ali hectar 28 merektetba indang osang tejangja agütsütsü mepeshia metetdaksüogo.

Ministry-isa, Shillong nung MoEF&CC indang regional office aser Guwahati nung sub-office dang takaratiba nung tenüngdakba osang agütsütsü atema Assam sorkar den sendaktepa inyaksü tetuyuba agütsüogo.



GOVERNMENT OF NAGALAND
DIRECTORATE OF TECHNICAL EDUCATION

☎0370-2270409
☎0370-2271432

Nagaland : Kohima - 797004

Dated, Kohima the 8th May, 2024

NOTIFICATION

NO.DTE/SCTE/6/2023-24: In view of some Diploma seats lying vacant under the State run Polytechnics during the current session 2024-2025, the interested candidates are hereby invited to come to the office of the Directorate of Technical Education, Nagaland, Kohima for spot admission on or before 17th May, 2024.

The admission against those limited seats will be done on the basis of "First Come First Serve Basis"

Sd/-
(Er. VIPULHOU LHOUNGU)
Director

Russian nuclear forces teti saksalema lir: Putin



Moscow, Monupii/May 09

(Agencies): Brehostibarnü Russia Tir Vladimir Putin-i par nuclear forces teti saksalema lir aser West nungi amokmerenba kecha nunga tatok magütsüsi ta tekum dangtsü shiogo.

Red Square nung par sepai meyerijang aika den jembidang Putin-i Ukraine nung raraba par sepaitem tenüing asang aser "Western elites" temi alima tesem ajungalen rara alitsü ajungmesor ta aitsü.

"Alima tesem ajunga nung rara nokdangtsü atema Russia-i akokba ajak inyaktüsü, aser kasa mapang shinga nema

aserek amokmeren mesüdaktsüsü. Asen strategic forces tem teti saksalema lir," ta Putin-i Victory Day parade nung ashi.

"Tembartem, tang Russia mepetmesü aser tongtipang mapang ka ajanga aor. Motherland tia aser tarutsü asenok ajak dak keta lir," ta pai ashi.

World War II mapang Soviet Union-i Nazi Germany madak takok anguba nungtem nung May 9 nü Victory Day parade ya agir aser Russia asoshi iba anogo ya tongtipangtiba anogo ka kumogo.

Russia tiri tang Ukraine anema raraba ya "Nazism" anema rarar ta aiben jembia arur.

Putin-i nuclear tsütsüa temulung tali agütsür. Hopta tetenzüklen pai Russian mitkartem dang Ukraine anasa navy aser sepaitem amenoka alirtem densema nuclear weapons drills agütsü totuyuba agüja liasü. Taoba ita Russia-i Comprehensive Nuclear Test Ban Treaty nungia ainshia liasü.

Victory Daya parade ya Red Square nung agir, kong advanced missiles aser air defence systems densema Russian mitkar indang hadirtem aser mitkar meyerijang aikati shilem agir. Küm shia Russia-i iba anogomung nung par linük asoshi tembar ta züngshiba linüktem nungi ketdangsurtem jaoker.

Taküma iba sentong nung taoba mapang Soviet nung aliba linük pongu - Belarus, Kazakhstan, Kyrgyzstan, Tajikistan aser Turkmenistan - aser ano Cuba, Laos aser Guinea-Bissau linüktem nungia lenirtem jaoka liasü.

Brazil tzümetsüng nung asür nisung 100 jungogo

Porto Alegre, Monupii/May 09

(Agencies): Brazil south tsütsü tzümetsüng sashia adokba nung asür nisung 100 jungogo aser emergency crew temi nisung aika samar aliba maneni bushir, ta yangji civil defence agency ajanga ashi.

Anogo aika tzünglu kanga sashia aruba ajanga Rio Grande do Sul state kübok municipalities 400 jungnüa nung tzümetsüng agi kongshi.

Tzümetsüng yagi nisung noklang aika yirutsü aser Bodhbarnü tashinung nisung 160,000 shi pei ki yutsür tesem balalai jena aotsüsa akum, aser nisung 128 tang tashi samar bushir ta state civil defence ketdangsurteri ashir.

State south tsütsü anogo tepiyong tzümetsüng tali adoktsü "high risk" nung lir ta Brazil indang national centre for natural disasters ajanga ashi.

Tzünglu ano tanaben tenzüktsü imlar, aser kanga

sashia maruaka tesem aika nung tzü kanga sashia atsüngtena lir aser ali ajak metenjemogo, ta ashir.

Nisung aika tajemtsü tzü mesüra electricity maka - mesüra tesem aika nung telephone aser internet services maliba ajanga teyaria memeshiteter.

State yimtiba Porto Alegre aser danga tesemtem nung 'emergency' maneni tali akumer, anungji nisung asü-amar tali akumtsü, ta state Governor Eduardo Leite-i hopta tetenzüklen shia liasü.

Nisung million 1.4 shi aliba Porto Alegre nung water treatment plants trok aliba nungi ana dang mapang shidak inyaker, aser mozüki aser nüburtem jenoka aliba tesemtem nung tankers ajanga tzü agütsür ta mayor indang office ajanga Mongulbarnü shia liasü.

Brazil Tir Luiz Inacio Lula

da Silva-i nüburtem nungdakba peritsüsü ta nangzüka lir.

"Rio Grande do Sul nung senotsü tsütsü timtem ajuruba asenoki angateter. State nem nungdakba ajak agütsüsü," ta pai Brasilia nung sentong ka nung ashi.

"Asenoki tang tashi iba tzümetsüng tasazük mejangjateter, aser ibaji tzü rosepba sülen ang jangjatsü," ta Lula-i ashi.

Rio Grande do Sul state tesem balala nung sepai, firefighter, police aser volunteers 15,000 shi yoka lir.

Brazilian navy-ia par indang NAM Atlantico rong - Latin America nung tulutiba - Bodhbarnü Rio Grande do Sul bushia mobile water treatment stations ana dener yoktsü teimla lir.

Porto Alegre nung tourists asoshi nungtugu Gasometro tesem nungbo Bodhbarnüa tzü metsüng maneni adoka liasü.

MULUNGEN O



ASO:
25-07-1933

ASÜ:
07-05-2024

"Ni Asoshi Taküm Alibaji Khrista aser Tasübaji Tajangzük"
Philipi - 1:21

Onoki teti meima aser akümstüba aliba tsürabur TAKAWATI JAMIR (Ungma), Kibubai moatsüba Tanular wadang tembanger alima nungi pila-a ogo. Iba mapang kinungertem mangyim tia nung alidang ana aser talang nungi shirnokisa nübu, rongsen aser sarasadem agi nungita yaritepogo, nenok temeim mapa onoki kodanga mamadoktsu. Asen takar Tsüngremi nenok ajak maneni moajang ta ozü sarasadem.

- Temeim Kinungtsu, Chirnurtem, Anükapang aser Semchirse nurtem



Office of the
Watsü Mungdang

HQ: Mokokchung, Nagaland
Regd. EDS/GSS/70/84-85 Dated 08-04-1986

AYIMOKTSÜR

Asen lima küm talangka sülen ULB election agitsüsa maongka bener arutsüogo. Iba election yabo taoba mapang dang nungi balaka asütsü, kechiyong tangbo Tetsür Shilem (Women Reservation) dener agitsüba lir aser aji Nagaland nung Tetsür Shilem dena agiba mezüngbuba ULB election asütsü. Talisa tetsürtem shirnok Reservation aliba mesüra Reservation maliba (general category) nung tokteper adokdir, nenok ya otsü yanglurtem asütsü aser aji koda jangratemtsü aser aji maongka tulu. Aji oda, ULB dak sentakba nung Watsü Mungdang-i iba sabang ajanga yimyim ka yamai ayimoktsünür.

1. Political party aser yimden tashiyim amshia yokba nübu ka mesüdaktsüner.
2. Tanü alima putu den sütepa otetba nübu akanger.
3. Sobaliba nung tarak/pungmen maketba nübu asütsüla.
4. Tsüngrem akümstüba den libaliru asüngteta aliba nübu südaktsünür.
5. Pei ajangzüktsü/ajungtsü asoshi bilemer masü nübur taginüba ajiteta inyaker nübu ka südaktsünür.
6. Pei temeten shinga nema rakzüka meyoki asenok nem agüja aliba temetenji amshia lenirtem shimtetsü Watsü Mungdangi ajungshir.

WATSÜ MUNGDANG

OFFICE OF THE
MERANGKONG MEDEMSANGER PUTU

P.O. Tuli, B.P.O. Merangkong - 798618
Dist. Mokokchung : Nagaland

TENÜNGSANG AGÜTSÜR

Ozü Senso tajung Wb. Marsanen Imsong, Lt. Wb. N. Yaongnok Imsong aser Lt. Wt. Tongpangkoka-er jabaso nem Aoli Tzükong terok sanger-i asen Aor lenitsü asoshi Ao Senden Tir menden maongka agütsü nung Ao Sünak abener ajak dang Merangkong Medemsanger Putu Menden ajanga pelaba lemsateper aser jabaso Wb. Marsanen Imsong danga kanga pelar.

Tsüngremi pa aser par kibong asen Aor lenitsü asoshi maneni moajangma.

Sd/-
LEMZUNGCHIBA
Secretary

Merangkong Medemsanger Putu

Pakistan nung kiralongrar temi nisung tenet tepset

Gwadar, Monupii/May 09

(Agencies): Brehostibarnü aita yangji mejanga alirtem dak tapi agi injang khaloktsü, ta prangbong bena alir temi osang ajanga ashi. Province kiralongra mapa inyaka ketdangsurtemi kanga kera Balochistan indang Gwadar nung Pakistan indang Punjab province nungi labourer tenet tepset.

Mapa tamajung inyakerterem ya Gwadar kübok Sarbandar tesem nung ango metsüdak anasa nisung aliba quarter kati

Province kiralongra mapa inyaka ketdangsurtemi kanga kera Balochistan indang Gwadar nung Pakistan indang Punjab province nungi labourer tenet tepset.

Tasü mang ya autopsy atema morgue kati bener ogo aser yirur alirtem ya Gwadar Hospital nung temang anepaluba mapang lir.

(Maneni tapak 8 nung...)

Hockey India-i FIH Pro League atema asayar 24 sangdongogo

Monupii/May 9, 2024 (Agencies): Antwerp (Belgium) aser London (England) nung asayatsü aliba taruba FIH Hockey Pro League 2023-24 atema Hockey India-i Brehostibarnü asayar 24 tenüng sangdongogo.

Belgium leg ya May 22 nü tenzüksü aser May 30 nü tembangtsü aser England indang leg ya June 1 nü tenzüksü aser June 12 nü tembangtsü.

Leg anaprongla nung India team Argentina, Belgium, Germany aser Great Britain den anabenben asayatsü. Parnok May 22 nü mezüngbuba Argentina den asayatsü. Asaya ti nung point 15 anguba sülen India team point table nung tang tasembuba nung lir.

India team captain asütsü atema Harmanpreet Singh

shimogo aser midfielder Hardik Singh vice captain asütsü. Squad nung goalkeeper tem rongnung PR Sreejesh aser Krishan Bahadur Pathak na densema lir aser defence atema Jarmanpreet Singh, Amit Rohidas, Harmanpreet Singh, Sumit, Sanjay, Jugraj Singh aser Vishnukant Singh nunger shimogo.

Midfield nung Vivek Sagar Prasad, Nilakanta Sharma, Manpreet Singh, Shamsher Singh, Hardik Singh, Rajkumar Pal aser Mohd. Raheel Mouseen nunger lir, aser forward nung Mandeep Singh, Abhishek, Sukhjeet Singh, Lalit Kumar Upadhyay, Gurjant Singh, Akashdeep Singh, Arajjeet Singh Hundal aser Bobby Singh Dhami nunger densema lir.

India head coach Craig

Fulton-i ashiba agi, iba asayamung ana ajanga team arangtetshitsü atema teyari agütsütsü.

India tebur Hockey team:

Goalkeepers: Sreejesh Parattu Raveendran, Krishan Bahadur Pathak

Defenders: Jarmanpreet Singh, Amit Rohidas, Harmanpreet Singh, Sumit, Sanjay, Jugraj Singh, Vishnukant Singh

Midfielders: Vivek Sagar Prasad, Nilakanta Sharma, Manpreet Singh, Shamsher Singh, Hardik Singh, Rajkumar Pal, Mohd. Raheel Mouseen

Forwards: Mandeep Singh, Abhishek, Sukhjeet Singh, Lalit Kumar Upadhyay, Gurjant Singh, Akashdeep Singh, Arajjeet Singh Hundal, Bobby Singh Dhami.

Carlo Ancelotti-i otsü tasen ka yangluogo



Monupii/May 9, 2024

(Agencies): Bodhbarnü nung Bayern Munich koka Real Madrid pur Champions League final 18bubai aiba sülen coach Carlo Ancelotti-i otsü tasen ka yangluogo.

Munich küm Allianz Arena nung mezüngbuba leg goal 2-2 agütsür tembangba sülen tanabuba leg nung Real puri asaya tatem goal na idakja goal 2-1 agi asaya akokba sülen parnok final-i iogo.

Iba asayamung 14 ben tashi koker aliba team ya tsüksü ana nung liasü saka asaya atemtsü lia Joselu-i minute 88 aser 91buba nung goal ana idaktsüba sülen parnok final-i iogo. Iba asaya ya season tepeyong nung asaya tajungtiba rongnung ka liasü.

Madrid pur final nung Borussia Dortmund den asayatsü, koba June 1 nü Wembley Stadium, London

nung asayatsü.

Real Madrid pur final-i aiba ajanga Carlo Ancelotti-i otsü tasen ka yanglua pa puti otsü nung football manager tem rongnung Champions League finals trokbenbuba tongtetba mezüngbuba coach kümogo.

Arishi küm 64 tain Ancelotti lenisüba nung Madrid pur tang agi tasembenbuba CL final tongtetogo. Pa lenisüba nung Madrid pur 2014 aser 2022 küma final-i iogo. Taoba mapang pa lenisüba nung AC Milan pur asemben tashi final-i iogo. Manager tem rongnung kati danga CL final pezüben dak tali tongteta mali.

Kasa mapang nung manager ka ama Champions League timbaben akokba record-a Ancelotti-i bona lir. Pa lenisüba nung AC Milan pur 2003 aser 2007 küm iba asayamung kokogo aser Real Madrid-ia 2014 aser 2022 küm iba asayamung koka liasü.

Premier League player of season atema Haaland nominate süogo

Monupii/May 9, 2024 (Agencies): Manchester City striker Erling Haaland taküm agi küm anabuba atonga Premier League player of the season atema nominate süogo.

Pa den külem team-mate Phil Foden, Arsenal midfielders Martin Odegaard aser Declan Rice, Chelsea forward Cole Palmer, Newcastle striker Alexander Isak, Aston Villa forward Ollie Watkins aser Liverpool defender Virgil van Dijk nunger den külemi nominate süogo.

Iba naroküm atema asayar ya public vote aser Premier League panel kati shimtsü aser May 18 nü sangdongtsü.

City caoch Pep Guardiola, shibai manager of the season award pezüben ngua lir, pa Arsenal coach Mikel Arteta,

Liverpool coach Jurgen Klopp, Villa coach Unai Emery aser Bournemouth coach Andoni Iraola nunger den külemi nominate süogo.

Taoba küm Haaland ya player of the season award aser young player award naprongla anguba mezüngbuba asayar aküm. Pai league asaya 35 nung goal 36 idakja liasü.

City pur küm pezübuba atonga title abentsü atema arishiba mapang taküma pai goal 25 idaktsür lir.

Taoba mapang Manchester United striker Cristiano Ronaldo-i dang season ana atonga iba naroküm agizüker lir. Pai 2006-07 aser 2007-08 küm iba naroküm agizüka liasü.

Iba ita England forward Foden nem Football Writers'

Association-i footballer of the year naroküm agütsüogo. Pai tang asaya aliba season nung league asaya nung goal 16 idaktsü aser assist ti süja lir.

Taoba season pezü tashi City nungi asayartemi Premier League player of the season naroküm ya agizüka lir. Kevin de Bruyne-i 2019-20 aser 2021-22 season aser Ruben Dias-i 2020-21 season iba naroküm agizüka sülen Haaland-i agizüka liasü.

Kasa mapang nung Haaland, Foden, Palmer aser Isak nunger Manchester United midfielder Kobbie Mainoo, Tottenham defender Destiny Udogie aser Arsenal defender William Saliba nunger den külemi Premier League young player of the season atema nominate süogo.

UWW-i Bajrang Punia nem tenokdangba agütsüogo

Monupii/May 9, 2024 (Agencies): Alima nung wrestling achayangba lokti tentet UWW-i Bajrang Punia nem taküm küm tatem tashi tenokdangba agütsüogo. Dope test agitsü memulungba atema NADA-i pa nem provisional suspension ka agütsüba sülen tang UWW-i iba telemtetba agiogo.

NADA-i tetuyuba agütsür aliba jangja liaka Sports Authority of India (SAI)-i pa bendanglen oa training agitsü atema sen lakh teku sanction sütsür liasü.

Bajrang ya linük nung wrestler tajungtiba rongnung ka lir aser pa nem NADA-i April 23 nü tenokdangba agüja liasü.

Tokyo Olympics bronze-medallist yagi, dope test atema pa indang sample agütsütsü atema pai nongnanga maliasü, ta ashiba den meyiper Dope Control Officer dang pa indang sample agitsü atema aruba



mapang expire sür aliba kits bener aruba indang telanzüba agütsütsü asüngdanga liasü.

Bajrang-i PTI dang ashiba agi, UWW-i pa nem tenokdangba agütsüba indang osang kecha magütsü, ajisüaka UWW-i internal system update asüba mapang pa nem tenokdangba agütsüba jangja jangja shisema lir.

"Item kulitem dak ajemdaker December 31, 2024 tashi tenokdangba agütsür," ta Bajrang indang profile update

asüba nung shia lir.

Temetetsü kaji April 25 nü Mission Olympic Cell (MOC) senden amenba mapang Bajrang-i, Dagestan, Russia nung May 28 nü nungi tenzüka training agitsü atema benokba dak sendakba nung tayimtsü ticket atema sen 8,82,000 dak tema sanction asüba metetdakja liasü.

Bajrang-i mezüngbo pa April 24 nü nungi tenzüka anogo 35 training agitsü atema benoka liasü, ajisüaka senzusenpongtsü atema anogo meputepba ajanga Arpil 24 nü masü saka May 28 nü aotsü telemtetba agia liasü, ta ashi.

Bajrang-i ashiba agi, pai SAI nem pa training atema proposal ka agütsüogo, ta ashi.

"SAI-i iba ya agizüka ya nia süngmanger. Ni sentong thiogo aser training atema kechaia maotsü," ta Bajrang-i ashiba den pa indang lawyer-i NADA nem telanzüba agütsüogo, ta ashi.

BENDANGLI OSANG : Tapak 7 nungi...

Pakistan nung kiralongrar temi nisung...

Balochistan Interior Minister Mohsin Naqvi-i iba mapa tamajung aitsü aser mangyimer kibongtem den asükhü lemsatapa liasü.

Balochistan Interior Minister Mir Zia Langau-ia Naqvi-i ama tasümit mapa inyakba aitsü aser osang tejangja meshia liasü. Mapa tamajung inyaker bushia asür nem ochi obendang shidak agütsütsü provincial sorkar tangatetba lir, ta pai ashi.

Pakistan nung telungpuri azüdokshiba April ita ano tali akumer, kong taoba ita iba ama azüdokshiba tejangja 77 liasü, ta Islamabad nung aliba Pakistan Institute for Conflict

and Security Studies (PICSS) ajanga ashi.

Azüdokshi ya Khyber Pakhtunkhwa nung timba ataloker, kong nisung asü-amaba 70 liasü aser item rongnung civilian 35 aser Pakistan security forces züngsem 31 liasü, ta PICSS ajanga ashi.

Balochistan nung iba ama azüdokshi 16 ben atalok aser iba mapang nisung 21 asüba nungi civilian 17 aser security personnel pezü liasü aser nisung 31 yiru, ta PICSS report ajanga ashir.

Item ya timba province indang Baloch belt nung atalok, talisa south aser southwest nung alitsü.

BILEMDANGANG
"Sempet keta aliba mamshira sama aotsü."